

Dapi 18 onns pretendà in ertavel la partiziun

La sentezia da Losanna na termimescha anc adina betg la disputa

DA CLAUDIA CADRUVI / ANR

■ Dastga ina dretgira reparter tenor agen parairi las sorts d'ina ierta. Il tribunal federal di che quai na va betg. La dretgira chantunala grischuna sto uss anc ina giada tractar il cas d'ina cuminanza d'ertavels che na pon betg sa cunvegnir sch'els vulan trair la sort u far in ingiant. Il 1966 mora il bab e lascha enavos la vaiva cun dus figls ed ina figlia. Dus onns pli tard mora anc in dals figls. La mamma, il frar e la sora furman ina cuminanza d'ertavels che posseda pliras immobiglias, ina chasa da vacanzas en l'Italia, ina chasa da pliras famiglias e 99 da 100 aczias d'ina societad. Il frar pretendà il 1999 la partiziun. La dretgira districtuala Plessur constatescha dentant be ch'il relasch ha ina valur da passa 6 milliuns francs e definescha la quota d'ierta da mintga ertavel. Sin il giavisch da reparter l'ierta n'entra la dretgira betg.

In ingiant intern u public?

Il 2011 sa volva il frar anc ina giada a la dretgira e pretendà ina partiziun ed eventualmain in ingiant intern tranter ils ertavels u in ingiant public. La sora sa dossta e vul che la dretgira furmia sorts. Ella propona gisst co che questas sorts duain sa cumponer ed a tgi ch'ellas sajan d'attribuir. La dretgira Plessur decida, pli u main sco il frar giavisch, ch'igl uffizi da concurs haja da manar atras in ingiant tranter ils ertavels. La sora tira vinvant

il cas e la dretgira chantunala decida il 2015, plitost tenor giavisch da la sora, suandanta repartiziun: Il frar survegn las aczias e la chasa da vacanzas e la sora la chasa da pliras famiglias. La mamma è dentant morta e ses relasch furma gia ina nova cuminanza d'ertavels che na tan-ghescha da principi betg questa procedura.

Disput da scienziads

Il frar recurra a Losanna e giavischha vinvant l'ingiant. El recloma che la dretgira chantunala n'haja nagina cumpetenza generala da reparter l'ierta, ella haja furmà las sorts a moda inadmissibla e repartì las sorts a moda arbitraria. Il tribunal federal dat uss raschun al recurrent e renviescha la chaussa a la dretgira chantunala.

Da principi pon ils ertavels parter l'ierta sco els vulan, scriva il tribunal federal: Sch'els n'èn betg perina han tutts ertavels il medem dretg sin singulas chaus-sas nun ch'il relaschader haja disponì insatge special ses testament u nun ch'i detia reglas specialas sco per exemplu tar in puresser. Sin dumonda d'in ertavel ha ina dretgira da furmar sorts. Co reparter questas sorts decidan lura en emprima lingia ils ertavels. Sch'els na rivan betg da sa cunvegnir, èsi da trair la sort. La dretgira chantunala grischuna aveva dentant facticamain furmà traiss sorts e – suenter ch'ils ertavels n'èn betg sa cunvegnids – attribui questas sorts als ertavels.

Il tribunal federal citescha plirs scienziads da la giurisprudenza. Ils meinis divergeschan: Ils giurists dad oz tendeschian da conceder a las dretgiras la cumpetenza da reparter las sorts. En ils commentaris vegls tar il cudesch civil vegn questa cumpetenza dentant snegada, uschia per exemplu era da Pieder Tuor ch'è stà avant tschient onns professer da dretg a Friburg (guarda fanestra).

Sentenzia 5A_396/2015 dals 22 da zercladur, pubblicada il 31 da fanadur 2017

Il tribunal federal sa referescha sin Pieder Tuor

En sia sentenzia tira il tribunal federal en consideraziun las opiniuns da la plirs scienziats, tranter auter quella da la corifea d'antruras Pieder Tuor (1876-1957). Il tribunal citescha mandlamain il giurist ch'è creschi si a Laax. Il professer da dretg e rectur da Friburg e da Berna aveva scrit a sias uras in commentari da 1100 paginas davart il dretg d'ierta. Tuor è dal reminent era s'engaschà sco redactur da l'Ischi ed ha translatà e commentà il cudesch civil ed il cudesch penal en rumantsch.